

**Inuit/ingerlatseqatigiiffiit nunaqavissut ujaqqanik pinnerasaasiassanik inuussutissarsiutigalugit ingerlanneqarsinnaanerat siuarsaavigineqarsinnaaqqullugu siunnersuineq tapersersuinerlu annertusarneqarnissaat siunertaralugu Naalakkersuisut sulissuteqaqqullugit peqquneqarnissaannik Inatsisartut aalajangiiffigisassaattut siunnersuut.**

(ATASSUT-ip Inatsisartuni ilaasortaaitai: Siverth K. Heilmann, Knud Kristiansen)

**Akissuteqaat**

(Inuussutissarsiornermut Aatsitassanullu Naalakkersuisoq)

**Siullermeerinnineq**

Aatsitassat pillugit ingerlatallu tamatumunnga pingaarutillit pillugit Inatsisartut inatsisaata nr. 7-ip 7. december 2009-imeersup (aatsitassanut ikummatissanullu inatsit) atuutilerneratigut Kalaallit Nunaanni inuit nunaqavissut aatsitassanik katersisarnissaannut annertunerusumik toqqammavissiisoqarpoq.

Siusinnerusukkut inatsit assigalugu Kalaallit Nunaanni ingerlatseqatigiiffiit aatsitassarsiorluni misissuinissamat paaanissamullu periarfissaqarput naliginnaasumik atugassarititaasut Aatsitassanut Ikummatissanullu inatsit malillugu. Allaammi ingerlatseqatigiiffiit kalaallinit pigineqartut sulisussallu nunaqavissut aatsitassanut ikummatissanullu inatsimmi § 18 naapertorlugu ingerlatseqatigiiffinnut nunanit allaneersunut naleqqiullugit salliussaatitaapput, tassami ingerlatseqatigiiffiit Kalaallit Nunaanni misissuineramik ingerlatsiniartut aallaaviatigut ingerlatseqatigiiffinnik kalaallinit pigineqartunik sulisussanillu nunaqavissunik atuisussaapput, kiisalu niuernikkut teknikkikkullu ajornartinnagu tunisassiassat Kalaallit Nunaanni suliarineqartussaallutik.

ATASSUT-ip siunnersuumminni tungavilersuutiminnut ilaatippaat inatsisissamat siunnersuummi allassimasoq nunaqavissut katersillutillu paaasinnaasut 100.000 kr. nalingat tikillugu immikkut akuersissummik peqanngikkaluarlutik. Naalakkersuisut ilisimatitsissutigissavaat inatsisissamat siunnersuutip ilaa taanna Inatsisartut Inuussutissarsiornermut Ataatsimiititaliaat inassuteqarnera naapertorlugu inatsisip naammassinerani peerneqarmat. Taamaattumik Inatsisartut isumaqatigiillutik kissaatigaat aningaasarsiutigalugu paaanerit tamarmik akuersissuteqartitseriaatsip killigititai malillugit pisassasut. Inatsisip imarisai malillugit periarfissatuaq tassaavoq, inuit najugaqavissut Kalaallit Nunaannilu akile-raartartuusut aningaasarsiornissaq eqqarsaatiginagu aatsitassanik paaqqaagassaangitsunik katersisinnaasut.

Annertuumik misissuinerup paaanerullu saniatigut aatsitassanut ikummatissanullu inatsimmi inuit nunaqavissut annikitsumik ingerlataqarnissamat kisermaassisussaatitaaffilimmik aammalu kisermaassisussaatitaaffeqanngitsumik akuersissummik qinnuteqarsinnaanerat periarfissiissutigineqarpoq. Annikitsumik ingerlataqarnissamat akuersissutit inuinnarnut Kalaallit Nunaanni aalajangersimasumik najugaqartunut aammalu tamakkiisumik akileraartussaataasunut taamaallaat tunniunneqarsinnaapput. Taamaattumik aaqquissuussinermi qulakkeerneqarpoq annikitsumik misissuineq paaanerlu inunnut nunaqavissunut taamaallaat

periarfissiissutaasoq.

Maleruagassat maannakkut atuuttut malillugit inuit nunaqavissut aatsitassarsiorlutik misissuinissamut pīaanissamullu periarfissaqarput, tassanilu ujaqqat erlinnartut ilaapput. Misissuineq pīaanerlu tunisinissaq siunertaralugu inuussutissarsiutigalugu ingerlanneqarsimappat aammalu katersuinissamut akuersissummik tunniussisoqarsimappat, katersuinerup naliginut annerpaaffissaliussanik aalajangersagaqanngilaq.

2010-imi septemperi tikillugu annikitsumik ingerlataqarnissamut akuersissutit arfinillit tunniunneqarsimapput. Naalakkersuisut naatsorsuutigaat suliassaqarfimmut tassunga soqutiginninneq siunissami annertuujussasoq. Akuersissutit taakkua qinnuteqaatiginissaat sioqqullugu Aatsitassanut Ikummatissanullu Pisorta qarfiup toqqaannartumik saaffiginnilluni annikitsumik ingerlataqarnissamut akuersissuteqarfiusinnaasut ilisimatittarsimavaat siunnersortarsimallugillu.

Namminersorlutik Oqartussat nittartagaanni [www.nanoq.gl](http://www.nanoq.gl)-imi annikitsumik ingerlataqarnissamut maleruagassat atugassarititaasussatut nalinginnaasutut iluseqartillugit aammalu qinnuteqarnermi immersugassat pillugit paasissutissiisoqarpoq. Tamatuma saniatigut aamma ilitsersuut “Annikitsumik aatsitassarsiorneq – aallartilluarit” saqqummersinneqarsimavoq, tassani nassuiarneqarluni annikitsumik misissuineq pīaanerlu qanoq iliorkuni aallartinneqassanersoq. Tamatuma saniatigut aatsitassanik annikitsumik misissuinissaq aamma pīaanissaq pillugu nalunaarut nutaaq suliarineqaleruttoq.

Innersuussutigissavarattaq inuussutissarsiornikkut siunnersorneqarnissamut taperneqarnissamullu periarfissat pioreersut, ilaatigut Nunatsinni Takornariqarnermi Inuussutissarsiornermilu Siunnersuisoqatigiit aqutigalugit, taamatuttaaq kontomi pingaarnermi 64.10.16-imi immikkoortitsisoqarnikuulluni Inuussutissarsiornikkut siuarsaanermut siunertalinnut tapiissutissanik.

Taamaalilluni Naalakkersuisut isumaqarluinnarput suliffeqarfinnut inunnullu nunaqavissunut aatsitassanik, ilanngullugit ujaqqat erlinnartut, annikitsumik aammalu annertuumik pīaanermik suliaqarnissamut periarfissanik pitsaasunik pilersitsisoqareersimasoq.

Siunnersorneqarnissamik taperneqarnissamillu pisariaqartitsinerit aqqissuussinerit assigi-inngitsut aqutigalugit matussuserneqareermata Naalakkersuisut inassutigissavaat siunnersuut itigartinneqassasoq.